

Ո Ր Ո Շ ՈՒ Մ Ն 12

/մաքսային վճարների գանձման վերաբերյալ/

«02» փետրվարի 2024թ.

ք. Երևան

Հայաստանի Հանրապետության պետական եկամուտների կոմիտեի Երևանի Մաքսային սպասարկման կենտրոն-մաքսատուն, վարչության պետի տեղակալ Աղասի Աղայանս, ուսումնասիրելով «Ար.Տոբակո» ՍՊ ընկերության (ՀՎՀՀ՝ 90002836, հասցեն՝ ԱՀ, ք.Ստեփանակերտ, Ա.Առաքելյանի փող. 24, տնօրեն՝ Համլետ Վազենի Վաչենանց, անձնագիր՝ AS0579417, հասցեն՝ ՀՀ, ք. Երևան, Վահագնի թղմ., 3-րդ տեղամաս, Որոտանի փող., տուն 6) կողմից «Ներքին սպառման համար բացթողում» մաքսային ընթացակարգով թիվ 05100010/110121/0000477 ապրանքների հայտարարագրով հայտարարագրված ապրանքների մաքսային ձևակերպման փաստաթղթերը,

Պ Ա Ր Զ Ե Ց Ի

«Ար.Տոբակո» ՍՊ ընկերության կողմից թիվ 05100010/110121/0000477 ապրանքների հայտարարագրով «Ներքին սպառման համար բացթողում» մաքսային ընթացակարգով հայտարարագրվել են ապրանքներ: Օրենքով սահմանված կարգով ԱԱՀ-ի վճարումը հետաձգվել է երեք տարի ժամկետով՝ մինչև 11.01.2024 թվականը, սակայն ընկերության կողմից ԱԱՀ-ի վճարումը սահմանված ժամկետում չի կատարվել:

ՀՀ ՊԵԿ Երևանի Մաքսային սպասարկման կենտրոն-մաքսատուն, վարչության ՓՀ և ԳՀ բաժնի կողմից 24.01.2024 թվականին տրված տեղեկանքի համաձայն՝ «Ար.Տոբակո» ՍՊ ընկերության ԱԱՀ-ի գծով բռնագանձման ենթակա գումարը կազմում է ընդհանուր 88,616 ՀՀ դրամ, որից ապառք՝ 88,193 ՀՀ դրամ, տույժ՝ 423 ՀՀ դրամ:

Նշված փաստի առթիվ ՀՀ ՊԵԿ Երևանի Մաքսային սպասարկման կենտրոն-մաքսատուն, վարչությունում հարուցվել է վարչական վարույթ «Ար.Տոբակո» ՍՊ ընկերության կողմից վճարման ենթակա մաքսային վճարների գանձման նպատակով, ինչի առթիվ 2024 թվականի փետրվարի 02-ին ժամը 10:15-ին հրավիրվել են լսումներ, որի անցակացման վայրի և ժամանակի մասին ծանուցումն առաքվել է ընկերության տնօրենին, սակայն վերջինս չի ապահովել ընկերության ներկայացուցչի մասնակցությունը հրավիրված լսումներին, ինչպես նաև գրավոր որևէ բացատրություն կամ դիրքորոշում չի ներկայացրել:

ՀՀ Սահմանադրության 60-րդ հոդվածի 8-րդ մասը սահմանում է, որ յուրաքանչյուր ոք պարտավոր է մուծել օրենքին համապատասխան սահմանված հարկեր, տուրքեր, կատարել պետական կամ համայնքային բյուջե մուտքագրվող պարտադիր այլ վճարումներ:

Իրավահարաբերության պահին գործող ՀՀ հարկային օրենսգրքի 79-րդ հոդվածի (հոդվածն ուժը կորցրել է 10.12.2021թ., ՀՕ-383-Ն) 1-ին մասի համաձայն՝ Կառավարության որոշմամբ ընտրված ավելացված արժեքի հարկ վճարող համարվող կազմակերպությունների և անհատ ձեռնարկատերերի կողմից ներդրումային ծրագրերի շրջանակներում ապրանքների ներմուծման մասով հաշվարկված ԱԱՀ-ի գումարների վճարման ժամկետը հետաձգվում է երեք տարի ժամկետով:

Ավելացված արժեքի հարկ վճարող համարվող կազմակերպությունների և անհատ ձեռնարկատերերի ընտրության կարգը սահմանում է Կառավարությունը:

ՀՀ կառավարության 24.12.2020 թվականի «Ներդրումային ծրագրերի շրջանակում «Ար.Տոբակո» սահմանափակ պատասխանատվությամբ ընկերության կողմից ապրանքների ներմուծման դեպքում մաքսային մարմինների կողմից հաշվարկված ավելացված արժեքի հարկի գումարների վճարման ժամկետը երեք տարի ժամկետով հետաձգելու մասին» թիվ 2147-Ա որոշման համաձայն՝ Հայաստանի Հանրապետության կառավարության սահմանած կարգով ընտրված «Ար.Տոբակո» սահմանափակ պատասխանատվությամբ ընկերության կողմից իրականացվող ներդրումային ծրագրի շրջանակներում 2020 թվականի դեկտեմբերի 29-ից մինչև 2021 թվականի դեկտեմբերի 31-ը ներառյալ ներմուծվող ապրանքների՝ համաձայն հավելվածի, մաքսային և հարկային մարմինների կողմից հաշվարկվող ավելացված արժեքի հարկի վճարման ժամկետը հետաձգվում է ներմուծման հայտարարագրման օրվանից հաշված՝ 3 տարի ժամկետով:

Իրավահարաբերության պահին գործող ՀՀ հարկային օրենսգրքի 79-րդ հոդվածի 3-րդ մասի համաձայն՝ նույն հոդվածի 1-ին մասին համապատասխան վճարման ժամկետը հետաձգված ԱԱՀ-ի գումարները ենթակա են վճարման պետական բյուջե մինչև հետաձգման ժամկետը լրանալու օրը ներառյալ:

Իսկ 6-րդ մասի համաձայն՝ սույն հոդվածի 3-5-րդ մասերով սահմանված ժամկետում ԱԱՀ-ի գումարները չվճարվելու դեպքում Օրենսգրքի 401-րդ հոդվածով սահմանված տույժերի հաշվարկումը և այդ գումարների նկատմամբ հսկողությունը «Բաց թողնում» ներքին սպառման համար» մաքսային ընթացակարգով Հայաստանի Հանրապետություն ներմուծվող ապրանքների մասով իրականացնում է մաքսային մարմինը, ... :

ՀՀ հարկային օրենսգրքի 401-րդ հոդվածի 1-ին մասի համաձայն՝ հարկի վճարումը սահմանված ժամկետներից ուշացնելու դեպքում ժամկետանց յուրաքանչյուր օրվա համար հարկ վճարողը կամ հարկային գործակալը վճարում է տույժ՝ 0.04 տոկոսի չափով:

Նույն հոդվածի 2-րդ մասի համաձայն՝ նույն հոդվածի 1-ին մասով սահմանված տույժը կիրառվում է ժամանակին չմուծված հարկի գումարի (այդ թվում՝ հարկային հարաբերությունները կարգավորող իրավական ակտերով սահմանված դեպքերում՝ հարկային գործակալի կողմից չվճարված), հարկերի կանխավճարային գումարների, հարկային հսկողության արդյունքներով հայտնաբերված (պակաս ցույց տրված) հարկի գումարի նկատմամբ՝ դրանց վճարման ժամկետից անցած ամբողջ ժամանակաշրջանի համար, բայց ոչ ավելի, քան 730 օրվա համար:

«Մաքսային կարգավորման մասին» ՀՀ օրենքի 58-րդ հոդվածի 1-ին մասի համաձայն՝ մաքսատուրքի, հարկերի, դրանց գծով տույժերի, տոկոսների, հատուկ, հակազնագցման և փոխհատուցման տուրքերի վճարման պարտավորությունը Հայաստանի Հանրապետության օրենսդրությամբ սահմանված կարգով և ժամկետում չկատարվելու դեպքում դրանց բռնագանձումը մաքսային մարմինների կողմից իրականացվում է օրենքով սահմանված կարգով և տարածվում է մաքսատուրք, հարկեր, հատուկ, հակազնագցման և փոխհատուցման տուրքեր վճարողի՝ Միության մաքսային օրենսգրքի 68-րդ հոդվածի 2-րդ կետում նշված միջոցների կամ այն ապրանքների վրա, որոնց համար չեն վճարվել այդ մաքսատուրքերը, հարկերը, հատուկ, հակազնագցման և փոխհատուցման տուրքերը:

Հիմքում ունենալով վերոգրյալ իրավակարգավորումների ամբողջությունը, հիմք ընդունելով թիվ 05100010/110121/0000477 ապրանքների հայտարարագիրը և ՀՀ ՊԵԿ Երևանի մաքսային սպասարկման կենտրոն-մաքսատուն, վարչության ՓՀ և ԳՀ բաժնի կողմից տրված տեղեկանքը՝ գտնում եմ, որ «Ար.Տոբակո» ՍՊ ընկերության կողմից հետաձգված ԱԱՀ-ի գումարը սահմանված ժամկետում չվճարելու հիմքով ենթակա է գանձման:

Ելնելով վերոգրյալից և ղեկավարվելով ՀՀ Սահմանադրությամբ, ՀՀ հարկային օրենսգրքով, «Մաքսային կարգավորման մասին» ՀՀ օրենքով և «Վարչարարության հիմունքների և վարչական վարույթի մասին» ՀՀ օրենքի 7-րդ գլխի դրույթներով՝


Ո Ր Ո Շ Ե Ց Ի

1. «Ար.Տոբակո» ՍՊ ընկերությունից հոգուտ պետական բյուջեի բռնագանձել **88,616 (ութսունութ հազար վեց հարյուր տասնվեց) ՀՀ դրամ** ԱԱՀ-ի գումար, որից ԱԱՀ-ի ապառք՝ 88,193 ՀՀ դրամ, տույժ՝ 423 ՀՀ դրամ:
2. Որոշման մասին օրենքով սահմանված կարգով իրազեկել «Ար.Տոբակո» ՍՊ ընկերությանը:
3. Որոշմամբ նշանակված գումարի վճարման հաշվեհամարն է **900005010120-ը (ՀՀ պետական բյուջե, կենտրոնական գանձապետարան, Երևանի մաքսային սպասարկման կենտրոն-մաքսատուն, վարչություն, ԿՈԴ 27):**

Սույն որոշումն ուժի մեջ է մտնում դրա ընդունման մասին իրազեկելուն հաջորդող օրը և «Վարչարարության հիմունքների և վարչական վարույթի մասին» ՀՀ օրենքի 10-րդ գլխի նորմերին համապատասխան կարող է երկամսյա ժամկետում բողոքարկվել վերադատության կարգով կամ ՀՀ վարչական դատավարության օրենսգրքով սահմանված կարգով՝ վարչական դատարան:

Սույն որոշումը կամավոր չկատարվելու դեպքում այն կկատարվի «Դատական ակտերի հարկադիր կատարման ծառայության» միջոցով՝ պարտապանի հաշվին:

ԵՐԵՎԱՆԻ ՄԱՔՍԱՅԻՆ ՍՊԱՍԱՐԿՄԱՆ
ԿԵՆՏՐՈՆ-ՄԱՔՍԱՏՈՒՆ, ՎԱՐՉՈՒԹՅԱՆ
ՊԵՏԻ ՏԵՂԱԿԱԼ



ԱՂԱՍԻ ԱՂԱՅԱՆ